



Paradera:

Districto electoral tradicional


PARADERA, cu ta extende na Tanki Flip y tur otro bario entre nan dos, ta basicamente e di tres bastion di MEP (Movimiento Electoral di Pueblo). Pa MEP, ta crucial pa keda un biaha mas e partido mas grandi den e districto aki pa mantene su posicion como e forza politico dominante na Aruba. Cu candidatonan fuerte manera minister Xiomara Maduro y prome minister Evelyn Wever-Croes, e partido aki ta parce di ta bon prepara pa enfrenta e desafio aki.

Den e proximo eleccion, ta cla cu cualquier persona cu kier lucha contra e candidatonan fuerte di MEP lo no tin un lucha facil. E dos politiconan ta gosa di popularidad considerabel y tin un trayecto solido den e gobierno actual. Wever-Croes ta ser mira como un lider carismatico cu a gana e confiansa di gran parti di e electorado, mientras cu Maduro ta conoci pa su compromiso y prestacion na nivel ministerial.

Sinembargo, no ta solamente e popularidad di e candidatonan individual lo determina e resultado den Paradera. Historicamente e districto a tin un asociacion fuerte cu MEP, y e partido a inverti hopi den desaroyo comunitario. Esaki a contribui na su status di favorito entre hopi residente. Ta di gran importancia pa MEP sigui fortalece e relacionnan cu e electorado y garantiza cu nan ta keda e partido mas grandi den e districto aki.

AVP ta enfrentando un reto dificil den Paradera. Aunke ta poco probabel cu nan lo bira e partido mas grandi den e districto aki, nan meta ta pa no permiti e diferencia di voto ta demasiado grandi. Pa AVP, ta esencial pa mantene un base di apoyo den cada districto, aunke gana Paradera actualmente ta parce di ta for di nan alcance. Probablemente nan strategia lo mester ta enfoca riba minimalisa e diferencia cu MEP pa nan por purba gana tereno den otro districto.

Pero, tin un hungado nobo den e panorama politico cu por cambia e dinamica den Paradera: Gerlien Croes. Croes, cu anteriormente a para na banda di AVP, awor ta presenta cu su mes partido. Si e hasi'e bon, e por representa un desafio serio pa ambos partido grandi. Croes tin e potencial pa provee un alternativa atractivo tanto pa votadonan di MEP como AVP. Si realmente e por kita voto for di e parti-



donan principal aki, lo depende di su campaña y e forma cu e logra trata e preocupacion y deseonan di e votadonan den Paradera.

E pregunta ta con bon Gerlien Croes lo bay y si e lo logra atrae votadonan cu tradicionalmente ta apoya MEP of AVP. Su partido ta ofrece un soplo di aire fresco den politica di Aruba, y si e logra transmiti su mensahe efectivo, e por bira e sorpresa di eleccion den e districto aki.

Sinembargo, Paradera ta parce un campo di batalla crucial den e proximo eleccion. MEP ta den un posicion solido pa sigui domina e districto aki, pero cu e retadornan nobo y e presion constante di AVP, nada ta sigur ainda. E siguiente lunanan lo ta crucial pa mira con finalmente e baraha di carta politico lo resulta den Paradera.

